

Astrid Britten, directora di Biblioteca Nacional Aruba

Cantidad di participacion pa siman di buki ta creciendo



ORANJESTAD - Biblioteca Nacional (BNA) ta teniendo e siman aki e "Siman di Buki" unda cu diferente autor ta bishita e scolnan cu ta participa, pero tambe den oranan di atardi nan ta presenta na Biblioteca pa asina duna presentacion di nan trabou. Directora di Biblioteca, Sra. Astrid Britten ta contento di mira cu e participacion na e siman di buki ta creciendo.

E siman di buki ta terminando mañan, cual awe y mañan ainda algun autor lo ta bishitando scolnan. Durante e bishita di e autornan na e scolnan, nan ta papia cu e muchanan riba algun di nan buki. "E siman di buki ta bayendo tremendo," e directora ta indica Bon Dia Aruba.

Autornan conta storia
Despues di oranan di merdia hopi mucha ta yega biblioteca sea pa busca un buki of articulo pa nan traha riba dje. Desde 3'or pa 4'or di atardi durante full e siman

tabata tuma diferente actividad. Riba e prome dia di siman di buki tabata presente e auto Curt Fortin y Nick van Leent. Sra. Britten ta bisa cu e autor Fortin e aña aki a skirbi e buki di festival, tambe cu a ilustra e buki Mariëlla van der Breek y e grupo di traimerdia a presenta. Durante e bishita aki Biblioteca a haya bishita di un grupo di mas o menos 130 mucha cu a bay hopi bon, e ta indica. Diamars e autor local Liliana Braamskamp-Erasmus a presenta na scolnan pa presenta su obra. Ayera e autor di Surinam, Indra Hu-Ramdas tambe a presenta dilanti e muchanan pa asina contra storia for di su obranan. Te cu awe Biblioteca Nacional tin e actividad cu e autornan ta bishita scolnan y despues di merdia nan tin actividad pa e muchanan. Pa algun tempo caba Biblioteca Nacional ta tene nan siman di buki. Nan ta organisa

e festival aki pa promociona lesamento y pa muchanan wordo envolvi activamente den e mundo di buki. "Ra...ra...ra con por ta? lesa pa bo sa!" ta e lema di e festival y e tema ta naturalesa, ciencia y tecnologia. E logo di Festival di Buki pa Mucha ta ilustra e tema.

E actividadnan ta tuma luga diferente caminda, tanto na biblioteca como na diferente scol. Tur aña ta scoge un tema central pa e festival y ta presenta un buki como e Regalo di Siman di Buki.

Cantidad a subi

A puntra Sra. Britten cu si e aña aki nan a mira un crecimiento den e participacion di scolnan pa cu e siman di buki. "E aña aki e cantidad a subi, mirando cu tin mas cantidad scol a participa," e directora ta bisa Bon Dia Aruba. Si e no ta kiboca aña pasa un total di 55 scol a participa y e aña aki esaki ta riba 60, cual ta scolnan primario y preparatorio. Incluso scol special ta participa den e siman di buki.



Tendencia internet

E tendencia di internet ta hunga un rol awendia, unda cu hopi informacion of buki ta wordo haya ey riba. Adulito, hoben incluso muchanan chikito ta conecta riba internet pa busca sea un articulo, buki of algo pa lesa. Segun Sra. Britten, den e ultimo añanan e funcion di Biblioteca a cambia, door cu e avansa tecnologico ta andando y tur cos ta wordo haya online. Pero asina mes bukinan ta

keda existi. E directora no ta mira cu buki ta algo cu lo desaparece pa e proximo añanan. Un ehempel cu e ta duna, ta cu ora a inicia cu "E-banking" tur papel lo desaparece, pero ora cu e bay banco e ta mira mas papel cu nunca. Bukinan ta keda importante. Biblioteca Nacional ta promove e lesamento.

Esaki ta algo cu completamente nan ta haci promocion. Nan kier muestra e importancia di lesamento. Ora cu un persona ta riba internet, e tin cu lesa. Manera ta desaroya e habilidad di lesamento, esaki no ta cambia.

Desaroya lesamento

Pa por desaroya lesamento Biblioteca Nacional ta cuminsa cu e muchanan. Pa motibo cu ta cuminsa cu e muchanan, esaki ta atrae e muchanan mas specialmente ora ta haci di bukinan yena cu plachi cu ta desaroya nan fantasia. Muchanan por desaroya nan fantasia pa motibo cu hopi storia tin un final habri, cu nan mes por sigui riba esaki pa mira con e lo termina. □